

Witõm Cie Babcio ukochano.

Wiyem, że downo zech nie pisał, ale nic ciekawego się nie działo bez tyn ostatni czas. Terazki mõm trocha wiyncyj do napisania.

Jak wiesz, do końca września byda się jeszcze uczyć ale zech Ci nie pisał co potem. Wiyem już, że poleca do Konciugini (co je w prowincji Sepik Wschodni to je wschodnie wybrzeże) i tam bez sześć tydni byda się uczyć jynzyka Pisin. Po tym czasie byda w Par (co je w prowincji Enga to je góry Nowyj Gwineji) na wprowadzynie się we kultura i poznani ichnich ludzi. Tam byda do Wielkiynocy a potem pora tydni nazod w Madang, kaj je zech teraz. Z tygo miysca poleca do Polski na urlop i załatwiani wizy pobytowej. W sumie mõm uciecha z tych gór, bo tam przynajmniej bydzie trocha zimnyj haha.

Ale nie o tym zech chciał napisać. Bez te pora tydni zdarzyły się dwie ciekawe rzeczy. Jedno z nich to wieczero z Henrym I jego familjom. Henry je wnukiem błogosławiõnego Piter To Rot. (Piter był mynczynnikiem za wiara zabitym przez wojoków japońskich we drugo Wojna Światowo). Henry je dobrym i pogodnym chopym. Opowiadał nõm jak to się dowiedział ze jego Mama je cerõm Pitera To Rot w dniu õgłoszynio jego starzika błogosławiõnym. Był õn wychowany przez inszo familjo i nigdy niy znoł swojij prawdziwej Mamy. Wiele by szło godać õ całyj jego historyji i lepij napisza õ tym co teraz porobio. Je õn szefym lotniska w Madang i przacielym wielu mojih współbratõw. I rychtyk fest pomogo we wszystkim a spycjalnie w przywożyniu noszych rzeczy fligami. Tela co my już przesłali i to za darmo to nie do się policzyć. I dziynki tymu mogomy lepij tukej funkcjonować.

Raduja się zech mõg poznać ich bliżyj we ta wieczero, pogodac bez godzinka z nimi przy jednym stole. Tyn czas przybliżył mi bardziej do ludzi do kerych mi Ponbõczek postõł.

Jak już pisa o ludziach to õpisza ci drugo ważno do mię sprawa. W niedziela 14 lipca õdwdziyõłech familjo katechety w parafyji Swina. Po roz piyrszy mõgõłzech obejrzeć, jako żyje i miyszko 80 % ludzi w PNG. Chałupa zrobiono z materiałõw, kere bierõm się we dżungli -jak trzcina czy liście palmy. Musza przyznać że tako chałupa To niesamowito konstrukcyjo. Nie õbejrzołech (że tak napisza) cołkij chałupy ale wiykszo czynść jak sypialnio, taki miysce jak izba dziynno a my gościyli się we kuchni, kaj na srodku je umieszczõne õgnisko a nad niym dwie metalowe belki na kerych pani dõmu narychtowała do nos õbiod. Musza przyznać, że ni ma to jak świeży Jam prosto z zygrody (coś w rodzaju ziymioka ale bardziej słodki i kruchy po uwarzyniu) do tego żymla z dõmowego pieca, kery je na dworze chałupy i przesłodzona herbata. Ludzie tukej pijõm napoje do kerych dodowajõm dużo cukru i soli ale to już inszo historyjo.

Niy ma to jak zjeść niydzielny õbiod z familjõm bardzo przacielskõm i oddanõm we zimnyj chałupie i z dwoma małymi świnkami, kere leżõm na progu. Obiecołech se tyż, że kej naucza się jynzyka Pisin i przyjada do Madang, to õdwdzia ich i õpowiyem, że ta gościna wiele dlo mię znaczyła i że to był mõj piyrszy roz, kiedy zech był w takiej chałupie.

To by było na tela co zech chciol Ci napisać.

Pamiyntej że przaja ci fest Babciu.

Z Bogiym.

Twój wnuczek Misjonarz